



Eggstoana Rud

Rudenkirtag Sierning CORONA SPEZIAL



<p>Da Rudnkirta fällt hei aus, fia uns Rudn is's a Graus, drum schick ma eich an Sängerguass, aufs Jahr schwing ma den Tanzfuass, mia haums ned glaubt, aber hoit ja, ees geht's uns do a wengerl ab, weil nach an Gstanzi, eicha Gfries oft so sche zan anschau is.</p>	<p>Willst di in Siang guat präsentiern, derf dir koa Fehler passiern: Vagiss koan Text und koan Schriatt, weu ma sunst stehat wird, dass die Gstanzi knackig san, und neamt beleidigt ist alsdann, und ned wias in Brunnbaun ist passiert, dass er sei Frau vagisst beim Wirt.</p>
<p>Vü Kinda gengan seit an Jahr am Freita net in d'Schui, is wahr, sondern streiken in da Au, gegen was, des woäß ma ned genau, sie ernährn si nur vegan, rauchen Gras, ja i maan de woin später halt gern, moi Bundespräsident werdn.</p>	<p>De Ex-Arbeitsministerin Christine Aschbacher trifft's schlimm, weng Plagiat, der Druck war z' groß, is sie jetzt ihr'n Postn los. Ja ois Politiker muasst sogn sollst hoit net studiert habn, weil auf dem Sektor kinnans schau in Kurz und Kickl goar net au.</p>
<p>Es is verruckt, d'Corona- Zeit überoi wird gestreikt, Verschwörungstheoretiker, vü Esoteriker a, Staatsfeinde, Spinner, nach der Reih, und a da Kickl is dabei, ma siachts, da rennan alle zaum, de grad d'Baumschui gschafft ham.</p>	<p>Waun ma geht auf a Alm, soi ma Regeln einhalt'n, gehts nur mit Klapperl am Berg, legts auf Markierungen koan Wert, lassts eure Hund frei renna, wern Küh und Keibön glei kemma, dasparst dir's Abagehn, koa Gscher, s'macht dann da Rettungshubschrauber.</p>
<p>Was so manche Kinder tätn, wauns eahne Eltern net hättn, wia in Rathgeb David, miasst's wissn, eam hat's am Kirta d'Hosn zrissn, vorm Auftritt seiner Hilberner muass d'Hosn vom Vatern her, nur de Hosn von dem Altn, hat dem Auftritt stand gehalten.</p>	<p>Da Lockdown is eher schlecht do für manche kimmt er zrecht. Weil in der Politik kaunst sehn, sinkt des Alkoholproblem. Da van der Bellen sitzt net z'spat in an Gastgartn grad, und es trinkt de Bierlein Gitti beim Autofahrn a jetzt nixi.</p>
<p>Der Trump is schau weg, da Kickl leida nu net, fahrt auf Corona voi drauf, husst de Wähler total auf. Er hat des Glück gaunz gwiss, dass d'Krankheit net so tödlich is, weil sunst hätt er, der Falott, seine Leut scho selbst ausgrott`.</p>	<p>Nationalrat Schnedlitz, va de Blaun, tuat den Coronatests ned glaubn, weil er behaupt` : bei Cola, schau, schlag'n die Tests alle au. Do wer hat je, muaß ma sogn si(ch) Cola durch de Nasn zogn, ja bei eam woäß ma ned bestimmt, was der sonst nu oissi nimmt.</p>
<p>De jetztige Krise, sogns schau, geht voi zu Lastn der Frau, weil d'Mauna huckan dahoam, koa Baumarkt offen, san so arm, was soins denn toan, alles fehlt, koa Fuaßballplatz und koa Bierzelt, zerscht: nia dahoam, hads gschimpft, die Frau, und jetzt bringts uns ned an.</p>	<p>Zum Abschluss gebm ma eich nu mit, machts de Massnahmen mit, gehts impfa, dass ma ebm, alle s'nächste Jahr dalebm, dass ma wieda tanz'n kinnan, Gstanzi für eich Leit'n singan, und ah's mitanaunda fei(er)n, auf des tan ma uns schau gfrein.</p>